



26. februar 2010

UPA 2010/40

Inatsisartut Suleriaasianni § 32 naapertorlugu aalajangiiffigisassatut siunnersuut imaat-toq matumuuna saqqummiuppara:

Kalaallit Nunatsinni ataavartumik efterskoliliornissaq anguniarlugu Naalakkersuisut pilersaarusiornissaannik peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Olga Poulsen Berthelsen, Inuit Ataqatigiit)

Tungavilersuut:

Ukiuni kingullerni pingasuni nunatsinni efterskolerniarlutik qinnuteqartartut amerlassusaasa takutippaat ataavartumik efterskolini inissat ikippallaartut. Qasigianguani efterskolimi inissanut 80-iusunut ukiuni kingullerni marlunni piffissaq eqqorlugu qinnuteqarsimasut marloriaatingajammik amerlassuseqartarsimapput tamassumalu ilaatigut kinguneraa pipallatamik Kangerlussuarmi utaqqiisaasumik efterskolimik pilersitsisariaqartarsimaneq.

Ukioqatigiit marluusut 2008-mi meeqqat atuarfiannit naammassinerannut atatillugu utaqqiisaasumik efterskolit sisamat katillugu 254-nik atuartoqartut pilersinneqarsimapput. 2009-mi Villads Villadsenip efterskoliata aallartinnissaanut qinnuteqartut 150-it missiliorsimavaat ukiumullu atuarfiusumut 2010/2011-mut maannamut qinnuteqartut 150-it missarluinnaaniillutik.

Ukiuni siuliini nunatsinni efterskolernissamut soqutiginnittut amerlassusaasa takutereerpaat inuusuttut atuarfimmik naammassinnissimasut ilinnialernissaminnut alloriarfissamik pisariaqartitsisut. Inuusuttut pineqartut ilinniartitaanikkut maangaannaq killittassanngippata pisariaqarluinnarpoq nunatsinni inuusuttut pisariaqartitaannut naapertuuttunik ilinniartitaanikkut periarfissiinissaq.

Siunissaq qaninnerusoq eqqarsaatigalugu pisariaqarluinnarpoq meeqqat atuarfianni naammassimasut tamarmik nunatsinni efterskolernissamut periarfissinneqartarnissaat.

Siunissaq ungasinnerusoq isigalugu aamma takorloorneqarsinnaavoq efterskolimik 9. aamma 10. klassimi atuarfiusinnaasunik inaarutaasumillu misilitsiffiusinnaasumik pilersitsisoqarsinnaanera. Atuarfik taamatut ittoq ilaatigut sumiiffinni ataasiakkaani skolehjemminut tapertaasinnaanissaa takorloorneqarsinnaavoq, taamaalilluni meeqqat inuusuttullu immikkut pisariaqartitsisut atuarnerminni ineriartornerminnilu pitsaanerusumik aqutissiuunneqarsinnaanerat.